

上饒縣志

卷八

關津 郵傳封禁山考附

古之為關譏而不征蓋禦其暴而非利其有也道路橋梁之修則龍見火見有期關以節其行止梁以達其往來雖小邑可無設乎饒之為關亦餘所為梁二十餘所為郵傳于其間亦十餘所而要害則在封禁一山險峻深關自唐宋以來寇盜憑之為窟穴居民受害官吏難制故歷朝封禁之有明加嚴焉豈曰無動為大蓋得失已見于前事矣

東關 在縣東二里叢桂坊址存

西關 在縣西三里關闈門外泰定坊址存

南關 一在縣南上塲三里嘉寧坊址存一在下塲二里開

化鄉水圮址俱沒

上饒縣志

卷八

關津

岑陽關 去縣南百二十里東通吳越南控閩甌為一方要害之地

撩竹關 去縣南一百里乃東甌捷徑

沙溪寨 去縣東五十里路通閩浙人烟輳集舊有巡檢司

明洪武間裁今增設塘汛撥兵戍守

鄭家坊鎮 在靈山鄉去縣北七十里與饒徽鄰境人烟輳

集為一鄉之會舊有巡檢司今仍之弓兵三十名今裁減

一十五名增設塘汛撥防兵戍守

八方場鎮 在來蘇鄉去縣南八十里與邵武接境山深路

阻奸宄所伏舊有巡檢司今仍之弓兵三十名今裁減十

五名增設塘汛撥防兵戍守

封禁山 舊設快手三十六名今革

張灣隘 舊設快手六十五名今革
楓林隘 舊設快手一百餘名以上俱守把銅塘封禁山柝
委老人管束今俱裁革

封坑口 縣西五十里江省要道新設塘汛戍守

石溪坊 縣西南五十里鉛閩要道新設塘汛戍守

平政橋 即郡城門外浮橋康熙壬寅郡守蔡廷輔以舊橋
高濶風急水駛改今制易名廣安至庚戌間橋復壞郡守
高夢說捐資重建汪應辰徐旭齡熊一瀟俱有記又有陳
貞詩備載藝文

鍾靈橋 在郡城南明天啟間知府蔣如竒始建石上覆以
瓦康熙己卯知府張國楨重建有佟國勳并自記雍正癸
丑水衝圯幾三之二知府程廷偉知縣陶士儂議易木以

上饒縣志

卷八

關津

二

石而艱于費邑紳士徐綱王珪周弘基楊必芳張之晉周
治王士禧毛廷桂捐金各百呈請檄七邑共襄之議遂定
督造者有盧琪汪元楹吳之淳全天爵鄭正官紀耀昌張
羽伯諸人程去知府陳世璠完其事而自為記更于橋南
建三義殿募僧看守月給薪米皆分北岸店租乾隆九年
七月初六大水橋圯

諸溪橋 縣西十里宋紹興間郡守林公建章鑄有記按圖
志以溪坵多櫛木名櫛溪或曰衆流之所會也故從今名
明崇禎間橋復圯推官吳鑄重修自為記

善濟橋 在進賢鄉宋真西山有記載藝文

三港橋 在進賢鄉

大津橋 在進賢鄉

渡坎橋 在縣東四十里

小澗橋 在開化鄉又名楊家石橋

虞路橋 在開化鄉西南七里

上宜橋 在乾元鄉南三十里

五馬橋 在進賢鄉

高橋 在縣南十里

大石橋 在石橋鄉二十里

峙溪橋 在進賢鄉

濟川橋 在來蘇鄉縣南十里

靈溪橋 在崇孝鄉縣東二十里乾隆五年水衝圯知縣汪

文麟修復以吏員張玉煥董治之九年七月初六日大水橋圯

槩溪橋 在靈山鄉縣北四十里

上饒縣志

卷八

津梁

三

通濟橋 在太平鄉縣東五十里康熙五十一年知縣黃中

驥重建有記載藝文

龍津橋 在石人鄉縣北九十里

北塘橋 在上饒鄉大學士夏言墓道劉必達建

萬安橋 在石人鄉

溪口橋 在縣治東雍正元年僧實霖募建

三港渡 縣南十里

城南渡 即平政橋邊水或暴漲橋輒解舊用小舟以渡甚

危成化五年郡守王翰置大舟二隻渡夫四人專守以渡人便之

後洋渡 縣南十里

靈溪渡 縣東二十里

香林渡 縣北二十里
峙港渡 縣南二十五里
破源渡 縣東七十里

郵傳附

府前舖 十里舖 靈溪舖 砍石舖 婁村舖 沙溪舖

以上通玉山

槿溪舖 冷水舖 方家墪舖 坑口舖

以上通興安

黃塘舖 上宜舖 毛村舖 喜嶺舖

以上通鉛山

黃村舖 中園舖

以上通廣豐

上饒縣志

卷八

郵傳

封禁考畧附

李鴻

信古荒服所謂吳頭楚尾是也秦尚為不墾之土漢武帝征
閩越由分水關入而道路始通不及貢賦東吳始建郡治
析為二縣歷晉至唐徙廢不常乾元初信州始有畫壤云
宋平江南分為江東路于鉛山分水關置驛由崇安入閩
又于永豐柘陽關亦置驛由浦城入閩是為二大關相去
數百里而其間空棄數百里在分水崇安之東柘陽浦城
之西者則所謂封禁山是也在昔寇亂大抵由此釀釁是
以傳禁不通人烟入我明而始益嚴扃鑰因以得名其隸
建寧者姑未暇述其在廣信者實名銅塘俗傳產銅殊未
可深曉今江西通志及郡志皆云此山在府南百里險絕
陡峻稱為一郡要害山有九井幽路偏側須備歷險阻始
上饒縣志

卷八

封禁考

五

達餘則不可復入矣人跡既遠平坡遠近皆不可得而知
也峭崿蒙茸攀援藤蘿僅得至半里者則滙為水潭臨為
絕壑毒龍猛獸之所居也

前世傳此山週圍數百里實廣長各三四百里北東西三面
則屬廣信屬邑之上饒永豐玉山南東西三面則屬福建
建寧之浦城崇安雖綰帶三省而去浙尤為密邇永豐小
路一通衢之江常一通處之龍景皆僅數十里是謂三省
之交其在分水柘楊二關別有小徑可通往來者往時大
盜葉宗留鄧茂七陶得二等陰通間謀人不復知載在鴻
猷錄可考又自鉛山接弋陽貴溪別通邵武延平建寧三
郡皆在萬山間遠者相去數百里近者百餘里嘉靖四十
年邵延山寇突至貴溪江窰山所經弋陽亦被焚掠皆由

此道賴都御史譚綸總兵戚繼光擊却之即其地也水脉數十條總為三支一支合上饒永豐經貴溪下流入湖而合于江一支合崇安浦城下福州一支自永豐至江山會台衢經錢塘入于海此其壤境相通之大槩也

封禁一山有內外新舊二處其界則始前代永樂宣德間鑛徒入山久之鑛乏山崩沒死者甚衆今名陷人坑此為封禁內山之門戶也自此而外如葉芳舒里已坑與永鉛二縣所屬各隘諸土名不可勝記自正統討平宗留之後槩為設禁今已盡成宿莽矣內山深邃奸宄易于託跡非設外禁以嚴之則寇盜冒險一入即可列柵自守時出剽掠為害滋蔓矣有如尋引斧斤實當隧而為之除道也

前自此山徑路稍通之後即為亡命淵藪其始托名採木實

上饒縣志

卷八

封禁考

六

則利于銅鐵或妄意其間有銀鑛也考之往牒大抵盜首以此誘聚流民流民不知從而蠅集始則各挾所有以銅鐵貿易往往相矜以利已而日久食盡于是劫之為盜自相部署出沒無常有難馴制者矣

凡盜入據舊巢見在不煩再闢且山居饒材易為營窳游手好閒者所在而有利之所在人必爭趨旬月之間數萬之衆可立聚也山故多銅鐵可成矛戟藤竹之屬可為弓矢箠盾以戰以守隱然一巨敵也仰攻深入豈易為力哉

歷代法令

唐郡治初開為亂者衆史載唐季羣盜依以為巢偽吳據而有之續入偽唐即此山也宋范汝為內訌閩卻延間有賊黨據此造器械以助汝為既敗其黨縱橫四出官兵追逐

遁入浙地改名施宜生陰附于金自范寇平後始立諸寨
閩志備存後之增設諸隘自此始元時尤為盜藪法令最
嚴常慮宋室遺胤有潛入以圖興復者是以累加防守浦
民逃匿輒加重刑或合山焚之國初上遣大元帥胡大海
經理東南詔以上鉛永屬廣信福建以浦崇屬建寧浙江
以江常屬衢州龍景屬處州禁互相侵越以此山獨當三
省之中非荒度所及第令封守如故而已最後草竊時發
乃因有司所請以上饒四十九都五十二三四等都永豐
十五十九等都鉛山十三等都每都各置十堡添設里老
畫地盤詰不許闖入犯者處以極刑家屬流放

永樂十年詔三省會議銅塘果否荒僻不堪建治據實以聞
時各省會勘如前惟令各縣分別所隸驅逐逋匿每歲本
上饒縣志 卷八 封禁考 七
府行上永鉛三縣會同福建浦崇二縣官查考一次詳報
各該上司有疎虞即奏聞

宣德七年浙江豪民項三等聚眾潛入銅塘又于四十二等
都地名包公尖五十都地名橫山頭五十三都地名洪水
坑等處起立鑪場一十二座聚眾萬餘因而流劫居民周
茂傑焚掠尤慘撫按三司臨勘具奏尋勅福建行都司合
兵擒獲檻送伏誅餘黨乃平

正統七年浙江處州賊王能鄭祥四蒼大頭葉宗留等聚眾
千餘入山盜礦十年掠永豐按院柳以聞乃會同叅議夏
僉事朱都司翁親臨踏勘行令本府知府董嚴行搜逐悉
毀鑪冶勾引及舍匿者各治罪調南昌前衛廣鉛二所官
軍及六縣民壯與王能等戰官軍被殺者甚眾永豐知縣

鄧顥同老人余斌入山招撫賊首王能等三十五人聽命
給與劄付將永豐二十四都瘠荒田地給與耕種以充快
手協同六縣民壯于永豐之橫山頭設教場並令都司翁
統集二所官軍以時操閱實所以鈐制之也王能既降復
令以計誘鄭祥四大蒼頭等三百餘人悉斬于永豐之十
五都獨宗留等與其部下遁去十三年二月宗留聚眾盜
掘處州少陽坑九月歷雲和至政和之少亭皆無所得謂
其徒曰與其取于山勞而無功孰若取于民眾從之時餘
黨尚數百人勢遂復振攻掠政和縣還慶元遣人招龍泉
良葛山人葉七為教師由浦城流劫建陽所過焚掠分眾
扼守鉛之車盤嶺行旅斷絕閩賊鄧茂七亦起于鄒武東
南大震上命都御史張楷偕都督劉得新陳榮帥兵往討

閩寇至廣信宗留率其黨時出抄掠楷留不敢進閩中日
益告急浙江藩臬請楷便宜移兵先擊宗留可無後顧江
西按臣亦言葉寇近咫尺危在旦夕大臣為國家排難專
之可也楷不知所從有指揮戴禮奮身願往勦之楷乃命
一率兵五百以往十三年十一月賊至黃柏舖戴禮兵擊之
死傷相半宗留衣緋率眾前中流矢死官兵不知為宗留
也賊退奔入山復擁葉希八為渠帥劫車盤嶺率眾駐十
三都欲由銅塘回浦城都督陳榮謂楷曰受命討賊今延
平事急而鉛道不通大軍密邇二賊並熾今遣部將往朝
廷謂我輩逗留將若之何楷不得已乃命榮帥兵二千與
戴禮合至鉛之祝公橋軍無紀律猝遇賊突前邀戰官兵
大敗榮禮皆死楷懼聞劉得新已率江西兵趨建寧遂取

道徃徃閩委浦城縣丞何率軍快數千永豐縣令鄧顥亦率本府六縣民快以應十一月十五日與希八合戰橫山敗績顥被執不屈罵賊死當是時人情大震恐遂無信州矣鎮守侍郎楊寧時在會城乃與三司議調南昌前衛及廣鉛二所官軍并集六縣民壯會于橫山迷不識道購得土著為前導大軍隨之進發然終不能深入相持數月僅無亾失而已朝廷聞知遣尚書金濂寧陽侯陳懋保定侯梁瑤平江伯陳豫等率京營及南直江浙等兵討之以中官曹吉祥王瑾為監軍兼制三省吉祥等素作威福濂等以計留之于浙而與懋及郎中陸移兵駐廣信分道入福建未至希八乃使人從鉛弋間道厚自結于茂七互為聲援此入彼出官兵首尾不能相應楷至建寧屢戰時有小

勝輒以捷聞會賊黨適有內却楷陰以計招其黨張由孫羅汝先等許以擒賊立功由孫等誘鄧茂七出戰敗死并擒其侄伯孫與家屬悉俘獻京師閩寇悉平希八以失援勢稍弱然猶據銅塘且耕且守已而復由浦城政和與陶得二楊希陶秉倫等合掠處州及金衢等處詔令張楷移師討處寇楷至有千戶沈俊者自言其部下皆麗水人親屬多陷賊中遣所親信以往宜可得要領皆從之乃令入山曉諭至以老母百口為誓得二出見楷優加賞賚令招餘黨希八尋亦出降始知前黃柏舖緋衣中流矢死者宗留也濂等時在廣信得報亦以銅塘寇平聞遂罷兵因與守臣會議善後事宜乃奏以附近民山凡去銅塘數十里內者悉加封禁如上饒五十二都三堡至八堡民田糧七

八十石及五十三四等都東至永豐十五等都西至鉛山十三等都田地皆不得耕種錄居民通賊者盡行誅戮家產入官被寇者量行給復徙之他所浦城崇安視此例凡諸洞向通往來之路悉甃石為障餘當溪水之衝不可施以人力者仍如宋元故事于上饒設高洲楓林張灣永豐設磁山軍潭港頭凡六隘擇素有恒業居民充為老人添設快手月給口糧令各分守信地統以寨官隨軍操演禁不許停插異郡商民及于隘內往來以月之朔望申報違者籍沒戍邊自是禁防愈密而地方始得寧息矣

成化五年上饒民錢文成等以拋荒既多舊額賠累不勝具奏乞免上命南京大理寺少卿夏時正勘議覆請以上饒荒田糧共七十餘石折作輕齋令太霞宮東嶽廟二戶包

上饒縣志

卷八

封禁考

十

納又將該都三堡八堡大溪遮礎等處令民得承佃輸納如故

弘治五年徽人孫榮程希道于永豐十五都起鑪作炭募工造枋都民詹鐸等告之于府以聞于撫按時三司會議皆言榮等雖不在封禁之內亦不應以異郡來往聚眾其端漸不可長治罪如律遂委縣官巡視六隘有無異民入禁及賊盜竊祭七年湖東道叅議張親臨六隘以上饒之高洲楓林張灣切近銅塘最為要害益兵防守衢之開化人徐天錫鄭白等潛住五十二都地名拷坑亦以造枋為業地方錢永萬等具首皆被擒治

正德二年按院喬奏將荒糧均派通縣永為定例從道士程守玄之請也六年徽人孫柰余卓等以禁山深廣不通歲

久度其中樹木茂密伐之可收贏利乃託士人錢志顯名奏除虎患意在復規銅塘也勅下都察院行本省具勘湖東道叅議王與府縣官前至所奏山場按流水舊冊鱗次詳考因得舊所設諸隘皆有累石舊址所蓄樹木不過樗櫟僅供薪樵之用且不能深入竟得原奏實非志顯柰等計窮坐以奏事不實事遂寢十年奸民某者在外山盜木漸入內地採鐵聚眾應鉛山民周吳李為亂巡撫都御史韓雍督兵征勦盡獲亂民因即舊界立石示禁每隘各立寨官復益兵快劄諸里老協同管守嚴連坐之法能獲盜竊以上者一體獎賞

嘉靖十九年高洲民潘四首發錢冬四盜取焚木昌七陰勸冬四為亂遂與其黨陳五殺死潘四及總甲翁青七逸去

上饒縣志

卷八

封禁考

十一

二十年昌七逃匿禁山久未獲捕官戴罪行緝後以計令親族誘其家屬繫之獄昌七逃死二十三年撫按題請申嚴禁約用石立界歲遣府佐一員會同上永鉛三縣巡捕官查有擅取其中寸木者必罪無貸

嘉靖三十四年南昌人某同方士陶仲文奏請重建許旌陽鐵柱宮因言工費動以萬計今帑藏空虛實不能給請以廣信封禁外山所蓄樹木採取庀工不足則以平洋坑所產礦銀助之得請仲文又以錄法得幸持之甚急該部覆行撫按勘報三司會議皆言平洋坑封禁山皆從仙霞嶺發脉南幹自草萍直走留都載在天下輿圖及朱子大全可考也開鑿貽害請為萬世培固陵寢為地方極活生靈亟賜停止奏上肅皇帝未之許也會閣臣揭言鼎建真君

宮宇凡以祝皇上無疆之福也人臣仰荷國恩即竭帑藏捐私財助之固所不恤况乃取于山林之產乎願以傷動龍脈上闕陵寢非臣等所敢任也不如令江西布政司發庫金數千建之便上從之言者亦不之罪

四十一年龍游人祝十八聚礦徒數百從江山經玉山程村往浦城欲邀衆分劫平洋銅塘為官兵所拒不得進退至常山復振集四百餘人殺傷縣兵突至草萍過玉山屯吳村令其黨余狗為說為柘楊巡司所執事聞巡撫江西副都御史胡松奏曰今廣信上永二縣所轄銅塘平洋地方綰帶衢建實當閩浙之交有岩峒谿壑之阻擅鉛鑛材木之饒為方可數百里正統間閩賊鄧茂七等蓋嘗盜冶其中知縣鄧顥追捕被害該前守臣請兵勦滅遂將前山封

上饒縣志

卷八

封禁考

十一

禁內有官民米七十餘石議令該都十里均賠其後輸納不前復奏令均派槩縣有籍可覈自正德及嘉靖之初閩浙諸寇往往竊據地方居民被其蹂躪至于累年而後定即今流棍乘江閩用兵多事之時糾黨操戈託名盜採意實伺便劫掠臣會同巡按江西按察御史陳志查得銅塘山場之與平洋坑均為盜所垂涎而平洋坑地尤浦城江山二縣之界重山復嶺疊嶂層岩一轉折十數步之外即主客爾我不相睹接凡茲醜徒潛伏草莽儔侶後先則為道路之行人俄而暗號一呼挺戈齊奮則數百千人可立而聚往江常浦三縣各相視為秦越且地方奸惡亦多觀望成敗幸其得開則可隨行分竊以自為利是以甘心為之耳目居停接濟者亦復不少僉謂必須比照汀州武平

之屬頗北潮州程鄉之屬漳南故事而以福建浦城浙江
之常山江山所屬之益亭溪源高泉仙霞小竿諸巡檢司
悉聽江西分守湖東道管轄提調責令盤詰探報可以先
期為備如遇各賊屯聚一體召集鄉兵首尾應援阻絕遮
擊勢盛則移文建寧兵道嚴金衢溫處守巡各道速發援
兵協力驅逐違期者聽江西撫按參論仍乞勅下兵部查
議果于事體可行請賜不坐名勅書一道專令分守湖東
道參議駐劄廣永豐縣治訓練營鄉等兵控扼禁緝逆折
潛消幸今永豐繕造有城落成伊邇可以屏維籓翰其于
閩浙三省撫按司道止于文移往來一切參謁儀文截然
無與廢乎于事可預于官可常于職不曠產賊之源稍清
而受賊之委可疏而塞矣疏上如議

隆慶三年有徽人者疏請開荒以濟國用通政使司立案行
該省嚴禁奸民五年商人復合謀具奏部行勘報如前且
言先朝嚴禁誠恐有徙突之患故立關隘設兵快以防不
測豈宜縱其開採以啟盜心此不遠之戒立至之憂也必
杜絕此端庶可以安三省之生靈其事遂格

萬曆九年丈量事起商人卽呂等因建議墾荒具奏不行復
陳告守道行委本府同知顧起淹知縣陳石卿勘明立遣
數百人賴以稍息

封禁條議

陳九韶

萬曆二十八年二月二十五日江西礦稅密木騰驥左衛百
戶趙應璧奏臣同土民俞文劉林袁仁吳華等親詣本省
德興玉山等縣地方勘得雲霧山場毘連開化等縣山勢

陡峻內有魯塢源小葫蘆大葫蘆東坑雷塢大瀟野豬塘
等處穿心四五十里週圍百十餘里適產大木森肥礦砂
湧盛官不徵糧民不佃種向蒙總督浙直江西都御史劉
畿于本山分水四至之外地名荒田塢倉壇西源黃岡嶺
界立牌封禁蓄養此木數百餘年若有以待皇上今日營
建大工之用也隨據劾勞官陸太楊棟騰龍方佐抄錄劉
都御史原勘本山案卷叅對一字不差相應採用伏乞天
恩加勅藩相督集杭蕪木廠商牙將本山官木大者解為
三殿之材小者着商變價又可增課數萬兩等因奉旨這
奏內江西山場地方出產大木或可三殿有用不必差官
以滋騷擾就着本省欽差督理礦稅開採木窩事內官藩
相會同撫按等官查勘明實具奏解部應用其浙江官山

等處出產土回青便着該省欽差開礦內官劉忠會同彼
處撫按等官查照開採解進應用立限與他該部院知道
欽此欽遵隨該廣信府知府陳九韶檄行上饒縣會集官
民諮訪商酌納里老楊士經柳大標議因條陳十不可開
利害揭稿

一附山居民自春初該監親來踏勘之日聞風逃竄者甚夥
無何幸接停止恩綸始漸稍稍復業今聞開採仍行該監
不日且入信州相顧駭愕咸思挈家而遠徙矣驚恐惶惑
人無固志流離荒蕩望絕烟火此豈太平之世所宜有耶
其不可開一

一禁山左右皆與民山相連該監官舍恃有奉旨明文必且
亂行砍伐區區小民誰敢與爭久之民山木植皆入棍徒

之囊橐矣昔該監祭山試採時已經砍伐居民王姓山木
本民至今敢怒而不敢言此其證已其不可開二

一召商數月不至大都商人憚于利小而害大其勢終不樂
應如必欲開採便須召募無籍召募所費工食從何取給
矧召募不足又必強役地方居民居民不應則召禍應則
生奸久之地方奸徒且與無籍棍黨合而為一而該監官
舍又為之鼓煽其間亂形立見覆轍不遠其不可開三

一禁山界連三省必會同閩浙互相防守然後可議開採願
閩浙以事非彼中終秦越相視安得指臂相使即本府各
隘防守勢須撥兵乃兵額有限除看守城池庫獄外見今
把總營輪班操練常病缺乏兵何從出如欲添兵餉何從
出此皆掣肘難行之說也其不可開四

上饒縣志

卷八

封禁條議

十五

一禁山南連崇浦東連衢處蓋四通八達之區也向以束于
法禁莫敢妄投今既云興工開採藉有該監聲勢凡四方
遊食之徒聞風響應潛踪竄入查得鉛山石塘紙廠槽戶
不下三十餘槽各槽幫工不下一二千人近因稅額太重
遠商鮮至槽戶亦漸罷槽而趨它業其幫工人流散各邑
羣聚為奸晝則募化夜則穿窬又平洋坑場礦脈漸細烏
合數千人與前夥無籍皆咬牙裂齒張目以待封禁之開
如開採果行此必亂之道也其不可開五

一是山自葉宗留窟穴盜礦以來雖久蒙封禁安輯而不軌
生心利孔者窺伺而動今若開山通路木植漸空砍伐之
場便為礦場勢必棄採木而爭言礦利矣山勢頗濶隨其
指向礦脈何處不可開挖始猶報監開礦為名久之奸徒

聚結累月連年官未必收其什一之利而構爭擾攘之亂皆由此始其不可開六

一山勢岑岩屈曲溪澗淺狹磧鹵無論木植變價甚微即採伐安從出水此該監所目擊者今如欲募夫開路費必不貲且路開矣而木難伐木伐矣而水難出窮數年之力捐數千金之資必無裨益而徒以攘禍滋募其不可開七

一自上饒擒拏奸黨之後若輩之飲憾積怒非朝夕矣縣官雖逐而其佐領雜職等官昔蒙差委者仰承當事執持意指俱亦以抗忤獲罪今該監官舍奉開採一入地方其甘心報復又不知肆威逞毒作何如狀近各原委等官聞風落魄願解組者且接踵矣其不可開八

一地方居民及夫馬等役自受監舍索詐騷擾之苦含冤靡控幸聞停罷明旨而奸棍陸太等猶然揚揚街市遂相率報仇羣擁爭擊幾成鼓噪唯時縣官為順民弭釁計收禁奸黨致有今日之禍今縣官雖去而居民及夫馬等處聞監差官舍之復來也日凜然懼其逞毒洩忿橫加魚肉相顧惶惶咸思奔竄蓋靡日不泣訴公庭求為活命無論山民逃徙即城市中日恟疑而莫能禁其不可開九

一該監近請設法變價之說亦明知山必難開商必不至而圖為終局計職嘗聞其與黨私議曰內山雜木出水難工本難又無大利先將外山易出之木責令有司召民包買姑薄其價以示招徠久之內山木植不愁其不并擗此其嚴行督責蓄謀已久矣今如不與力爭該監見商之不來而事終不可罷其勢必行前說是時將順之乎阻之乎順

之則小民遭殃人情騷動阻之則有司賈補滋甚其不可
開十

開礦事宜第一議詳稿

都守陳九韶

照得開採之議通省直各遵行已久固不獨廣信一府為然
然未有費百而得一久勞而罔功如此中之甚者王永二
縣礦場自昨歲閏四月內即已興工內監親臨踏勘面試
烹煎未見真礦隨委舍人潘良桂于永豐原奏趙應璧于
玉山督同委官夫匠極力開採二官舍仰承付托行之半
年迄無成效乃以試礦無人稟請內監移文本府本府即
嚴行該縣增置巨斧大鑿購募識礦人匠多方開挖併力
用工竊冀此舉庶幾可得真礦今又行之半年而不得如
故計費不下千金所進礦銀僅二三十兩以見在之錢糧

上饒縣志

卷八

開礦奏疏

十七

填空虛之印壑朝廷方欲借充內帑而不知先已捐竭外
帑近經親往礦場面督開採據舍人礦匠等揀選上砂試
之烹煎玉山毫無永豐于四十斤中止烹得銀四分實與
向來報數微薄不異又勘得興安礦場古洞雖多類皆積
水深窟人工難施今開鑿新洞砂色尤不逮王永遠其詢
之舍人劉慶則云出自永豐土民鮑忠所報正在差人同
舍拘責鮑忠親認礦脈酌議申報間而玉山以楊春首報
開採土青之議且見告矣無何而上饒又以劉鑑等首報
包開礦山之議接踵至矣夫王永不得旁及興上礦砂不
得旁及土青在內監若謂多一處多一利孔在職則以為
多一處是多一耗門與其徒滋糜費無補涓滴又孰若即
以庫藏之積進之朝廷猶為得策乎且年來縣中礦費每

每借支府庫近蒙清查無礙報解一空即欲奉行費安從
出今內監行文上饒責令首民劉鑑等自行開採似得此
意請乞倣照舉行于興安礦務責之原報鮑忠玉山土青
責之原報楊春責令親認真脈督率工匠倘幸成功不吝
厚賞不則治以欺罪庶幾人有專責勉圖自効可以杜妄
告之風不然邇來奸民甚夥將無人不可言礦無地不可
開礦浸淫蔓延曷所底止自是以後不特廣信無寧日恐
江右之乘風而起者不乏是豈盛世所宜有耶至于玉永
二邑開採已及一年大槩成效可睹其虛費無益即原委
官舍亦已灼見明言但不樂為報罷之說耳合無請乞台
裁容本府嚴督興上二邑責令委官協同原報土民并力
開採以圖成效其舊開永玉礦工行令二縣姑暫停止俟

上饒縣志

卷八

開礦奏疏

十八

興上二縣得有真礦則玉永遂可終罷誠萬分厚幸倘復
寡効如前是竟以見貯錢糧徒飽遊手之腹而朝廷不得
絲毫之用結局何期此非職等淺識之所能任亦終不能
不煩台臺明慮也事關地方義難默默理合據實上請

礦青事宜第二議詳稿

陳九韶

聞之智者能見未然愚者僅見已然職至愚極陋初但見開
礦之害又但見動費官錢之害迺今詳察事勢竊以為採
青之害甚于開礦自備資本之害甚于動費官錢請據職
踏勘耳目所及言之江西採青原未奉有明旨內監首行
于玉山而該縣唯唯從之緣是時欲請罷礦唯恐牴牾僨
事不得已姑為權宜計耳今勘得採青如鳳凰山徐涼柵
等處採及本山者十之三四而波及民間墳墓者十之七

八且玉山未幾蔓延永豐今永豐之翁村山青蓬山等處
民居墳墓之側亦皆無完土矣夫開礦雖闕利害猶于深
山空谷中尋脈探洞屬有定所豈如藉口土青無處不產
徧地開挖伐木毀墓所在卽墟光景如是之慘毒乎故曰
土青之害甚于開礦者此也昔年動支官錢募夫開礦惟
是冒費庫銀幾及千金而所得不百之一故權于利害之
多寡以為宜罷耳今之開礦則不然據奸民初報不費官
錢而可大裨國課其言似甚美足聽迺今查所進銀砂微
薄光景如昔兼之荒人田地曰此蓬廠所用也佔人山土
曰此鑪場所需也伐人林木掘人墳墓室廬曰此礦脈所
在也擾害多端不可枚舉山間小民敢怒而不敢號者久
矣夫昔之開礦官為公夫官為給廩故猶得以法令相約

束而彼夫若匠亦猶羈縻于約束而無敢橫今雖動稱自
費毫與地方無涉一加詰問目為阻撓法令所不能禁約
束所不能施豪橫恣行莫知底止官開之始有是害乎故
曰自備資本之害甚于動費官錢者此也若奸民妄報欺
罔之狀則又有可得而言者焉夫玉山之鉛坑興安之砂
砵潭久已得請封閉矣迺璩道椿諱言鉛坑而偽換牛眠
洞銀岡嶺和尚岡花園頭等山名劉遇春報稱砂砵新洞
去舊洞五六里許各准監批擅自開採今職親自勘踏璩
道椿所開新洞離鉛坑不二十步牛眠等山從來並無
此名劉遇春所開新洞與舊洞亦一望可及形跡具在誰
能掩之其偽造別名及妄稱隔遠之說無非假托聳聽以
求濟其私耳至于平洋坑礦場鮑忠及夏子顯包開同一

處所也鮑忠色僅半載查其夫匠多不過七八十名乃其輸納官銀已一百八十餘金夏子顯色及年餘其夫匠動至數百官銀所進則僅三十八十餘金耳夫子顯以為無砂何以能聚眾且久以為有砂何以輸納官甚微職詢之人言及差舍輩皆謂子顯已饜飽去留此不了之局藉多口夫使朝廷封閉之旨奸民得以擅開朝廷開採之權奸民得以充橐此豈清平之世所宜有耶竊念明旨德意原云不忍加派小民今小民無加派之名而實不啻催科之困官府無徵求之令而實不勝督責之擾害歸百姓而利歸奸徒怨歸朝廷而累歸官府及今失圖恐山谷之黨聚日滋不解小民之怨忿日積靡控一旦鬱發而莫可誰何當誰任其罪耶伏惟台臺裁示可否并乞移文該監亟賜上饒縣志

卷八

開礦奏疏

二

停止庶亂萌可杜而地方少安生靈幸甚

買山疏

江西稅務太監潘相一本為禁山甚難開採有司酌議色價懇乞聖明俯順輿情以安地方事萬曆二十八年八月內該騰驥左衛百戶趙應璧劾勞官陸太土民俞文等奏為隱漏官山大木私盜土產回青等事內稱江西德興玉山等縣封禁雲霧等山毘連開化等縣出產大木督集杭蕪商牙將本山官木大者解為三殿之用小者着商變價等因奉聖旨這奏內江西山場地方出產大木或可三殿有用不必差官以滋騷擾就着本省欽差督理礦稅開採木密事內官潘相會同撫按等官查勘明實具奏解部應用其浙江官山等處出產土回青便着該省欽差開礦內官

劉宗會同彼處撫按等官查照開採鮮進應用立限與他該部院知道欽此欽遵除採青一節臣移文浙江開礦內官劉忠採辦外一面移會撫按等官集議採木遂于三十年二月內臣率領効勞官陸太等前往廣信府勘山已畢隨具本題知訖直至三十一年三月內臣准撫臣夏良心手本開稱該本院會同江西巡按吳達可看得銅塘山崇岡邃谷險峻異常夙為巨寇淵藪即中有雜木無從出山其不可開與不能開之狀兩院前疏已悉復檄行道府徧示召商竟無一應即本院亦日凜懼無以副上意今閭郡小民因本院督趨之嚴道府召商之亟恐一旦開山奸徒叢集相煽為亂利未必有裨于國家而禍已先及于地方患在切膚情出無已乃先後具詞議于廣信七縣包納山

價銀三千兩此山永永封禁然不求得山惟求遠患其勢誠迫而其情可矜也如必欲有事于開採恐欲就事而反致誤事報命無日不能不及時而早計之既經司道府縣酌議包價似當順從等因備移手本到臣臣伏思踏勘之後徧示召商攄誠布公曲盡招徠之術雖竭犬馬之衷奈商無一應隔越二年復懼久遠欽限恐陷違悞之愆即經會同撫按道府等官夏良心等面決良便之策以復上命諸臣僉謂此山斷難開採乃以廣信府所屬七縣包納山價銀三千兩續議加增土產折價銀一千兩一併解進助工其土產折價歲以為常復經廣信府守巡二道薛士彥方萬山知府陳九韶并南昌道陳鶴湖西道王佐署南昌府印推官喻安性再議相同臣已于本年五月內具奏至

今未蒙批發謹據實再陳伏乞萬歲爺俯鑒開採之難
閣郡輸資之急容將包價折價等銀准令解納恭進勅下
遵奉施行奉聖旨原封禁山採木變價以助大工今既內
外官員看議本山寬遠險峻難行乃以所屬七縣里老民
入告稱情願包納山價銀三千兩認買此山永為封閉以
安地方人心并各府每歲議派置買方物銀一千兩解進
應用俱依議行該部院知道

工科右給事中宋一韓等一本為聖慮本徹民瘼奸璫欺侮
愈甚懇乞聖明核原疏正國法大彰睿斷事頃見江西太
監潘相疏言禁山甚難開採有司酌議包價等事業奉欽
依下部院矣臣等看詳至此相視錯愕者久之蓋聞聽言
之道必以其事核之然後虛實可程而功罪可定也潘相

上饒縣志

卷八

買山疏

二十二

初議採木封禁山維時臺諫糾駁撫按爭執幾于毫釐
舌而天聽自高猶意諸臣之過計不如寺人之忠厚耳豈
應蹉跎四年終罔實効及計畫無復之始議包買山銀三
千兩方物銀一千兩朦朧代奏此曾不能給里巷童豎乃
欲欺聖明乎相亦自知說謊之辟不可借計非阿堵不得
完此局面故為此刀錐微利以嘗陛下巧則巧矣獨不思
祖宗山河金甌無缺倏焉賣山之名自潘相始後將何觀
臣等竊謂潘相可誅也今不但不加誅且可其奏臣等方
駭天威之佚于罰而佞人之脫于網也伏乞皇上大奮乾
綱特賜宸斷罷買山之名正欺侮之罪庶國法彰而佞人
遠云云等因具題奉旨依議免